



Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

Is seti cuaddus de oru

Una diri biviat unu predi ca teniat unu fradi ca fiat in circa de si cojai, ma dd'iant torrau ca nou po dexiotu bortas. Una diri si ponit in sa ia po andai a Escalaplano, e candu fiat passendi in unu sartu iat biu una feminedda bècia ca dd'iat preguntau:

- Ita tenis ca ses aici tristu?

Issu dd'iat arraspusta:

- Ita apa a tenni ca m'ant refudau dexiotu bortas po mi cojai.

E cussa fèmina dd'iat torrau a nai:

- E sceti po custu ses tristu? Non ses ancora lòmpiu innui s'agatat sa fèmina ca as a cojai. Sa fèmina po tui est sedatzendu farra asuta de una mata de arenada: piga custu arrogu de paperi, bai anca est issa stuvona in terra po agatai su chi nc'est scritu innoi.

S'òmini, arribau anca dd'iat nau cussa feminedda, iat stuvonau in terra e fiat andau de su babbu de cussa piciochedda po ddi preguntai sa manu de sa filla po sposa.

Ma su babbu dd'iat arraspustu ca issa non fiat in stadu de si cojai. A fortza de insisti s'òmini nci-dd'iat fata a si-dda cojai. Dd'iat bitida a domu e dda teniat cumentu una filla.

Intzandus iat mandau a Orroli seti cuaddus de oru, ca iat agatau in cussu logu, su de seti si fiat truncau in su caminu e nd'iant sarvau sceti sa metadi. S'àtera metadi dd'iant cuada in Santa Caterina, e is ses cuaddus e mesu fiant arribaus a domu sua, ma sigumenti su dinai fiat annarbau, dd'iat postu a asciutai a su soli.

Is bixinus dd'iant biu e dd'iant portau acùsa a su governu, intzandus su predi dd'iat suterrau in unu aposentu aintru de una càscia ca balit ses mila francus.

Apustis de annus meda, is chi biviant in cussa domu non podiant dromiri po mori de is sonus ca s'intendiant in cussu aposentu.

Intzandus iant tzerriau unu predi ca nc'iat bogau cussus spìritus de sa Serra e pariant unu tallu de crabitus e de intzandus no iant intèndiu prus nudda.

Medas bortas iant circau de ndi pigai su dinai, e sigumenti sa domu dd'iat comporada ajaju miu, issu iat tzerriau unu predi po ddi nai a s'ànima de di donai su dinai, ma issa iat arraspustu ca is cartzollas bècias baliant prus de sa conca de su predi.

Pagus tempus fait fradis mius iant detzìdiu de ndi pinnigai su dinai ma casi ca fiant stètius tzerriaus arrolaus no ant pòtziu fai nudda.